

# Id ash d Peter Wehpeg O'ohana

---

**1** Ni-wepnag:  
Am ant ha'ichu wo i em-o'ohani ahni Peter mani d kehshaj g Jesus Christ. Heg at am i ni-kei mant wo i ahgahi ab amjed. Kuni ha'ichu s-em-ahgidamk ahpim mam am a'ai kih Pontus ch Galasia ch Cappadocia ch Asia ch Bithynia jejewed ch ed hab masma mo g ni-wehm Tutuligo. <sup>2</sup>Jiosh at ab i em-gawulkai mamt d wo hemajkamgajk k ab em-mah g Hekia S-ap'ekam Gewkdag mat wo em-wehmajk ch am wo i kegch g em-dodakag. Mt hekaj ab wo s-wohog elidad g Jesus Christ ab i s-wohochudk mat iawua g e-eh'ed k e muhkid em-wehhejed.

Ab o wa si s-em-ho'ige'id g Jiosh ch ab wo wa ba'ich i em-mahkad g i wehmtadag ch s-ap tahhadkam.

**Mach ab wui t-gewpkadch  
matt ep wo t-chegito**

<sup>3</sup>Ab att hig wo si i ho'ige'el g Jiosh heg hekaj t-kownalig Jesus Christ. Heg ohg Jiosh at ab i wuhshad muhkig t amjed. K id am t-chehgidch mat hab wa'ap ab wo i t-wuwhas muhkig t amjed. Tt heg hekaj ab i s-wohochud k ab bei g wechij doakag.

<sup>4</sup>Jiosh o an nahtokch g si s-kehg kihdag am t-wehhejed an dahm kahchim ch ed. T ihda ap'echudaj chum hekid d wo hekiakamk ch pi hekid wo e padch. <sup>5</sup>Ab ach s-wohochud g Jesus Christ. K heg hekaj t-nuhkud g Jiosh g si ge'e e-gewkdagkaj. Kuch ab nenida mat s-ap wo maskogi g t-do'ibiadag mat hekid wo huhug ihda jewed.

<sup>6</sup>Si g wo s-hehigik mamt wo e do'ibia, chum ams hems ab wo nakogad g nahnko mahs sho'igchudadag ch pi ap tahhadkam hemu. <sup>7</sup>Ihda em-sho'igchudadag at wo a'appe g em-wohochudadag k wo chehgi mo d wohokam hab masma mat g ohla g meikaj wo e a'appe mas d wohokam. Ia atsh ep wo i e chehgi Jesus Christ. T g Jiosh am haha wo chehgi mo ab si has em-elid.

<sup>8</sup>Pi am hi wa chum neid ch wabshaba ab si tatchua ch ab ep si s-wohochud. K id hekaj si ge'ej g s-em-hehigig. Kumt pi wo sha'i e nako mams wehs s-ap wo ah. <sup>9</sup>Jiosh at em-do'ibia namt pi ab i s-wohoch g Jesus Christ.

<sup>10</sup>Hegam mash d Jiosh ha'ichu i tashogiddam oki wa an o'ohan matsh an wo em-ai ihda do'ibiadag

ha'ichu ahga ch eda an ep chum  
hoanahim g e-o'ohana ch an chum  
mamche <sup>11</sup>mas hekid wo i k ch  
has masma hab wo e juh. Christ  
atsh ab ha mah g Hekia S-ap'ekam  
Gewkdag. Sh heg am ha tashogid  
matsh gam hu si ha ba'ich hab wo  
e juh matsh wo e sho'igch g Christ  
k haha wo bei g ab si has elidadag.  
<sup>12</sup>S-mahch ash mat pi wabsh hejel e  
wehhejed o'oha hegai mash am ha  
wui i e tashogid.

Hemu at hab e juh hegai matsh  
wa an o'oha. K ahpim d em-  
wehhejedkam mamt wo kah. Jiosh  
chuhchai ash am em-ahgid ihda  
s-kehg ha'ichu ahgaj. K g Hekia  
S-ap'ekam Gewkdag ab ha mahkch  
g gewkdag mat an wo ahgahid.  
Ihda wohokam o sha'i si s-ta  
kakaimea chum hems g anghil ha  
wehhejed.

**Mattsh d wo chum si  
hekia s-ap'ekamk**

<sup>13</sup>Am g wo i e nakog k ab wo si i  
e nenenashanichud k ab wo si i e  
gewpkai heg ab ho'ige'idadag mat  
g Jiosh wo em-mah mat hekid ep  
wo jiwia g Jesus Christ. <sup>14</sup>Ab g wo  
s-wohog elidad g Jiosh ch pi wo  
sha'i e hiwigi mams ged hu uhpam  
wo shul heg eda pi ap'ekam mam  
wa ab tatchua mam eda pi mahch  
g Jiosh. <sup>15</sup>Jiosh at ab i t-wai matt d  
wo hemajkamgajk. Kutt heg hekaj  
d wo chum si hekia s-ap'ekamk hab  
masma mo g Jiosh. <sup>16</sup>An o o'ohanas  
Jiosh o'ohana ed mo hab kajj:

Hemho wa amt d wo hekia  
s-ap'ekamk nani pi  
ahni d hekia s-ap'ekam.

*Leviticus 11:44-45*

<sup>17</sup>Bam masma ihm g Jiosh ab e  
ho'ige'idahunch wui mo d em-ohg.  
Kut heg wehs wo ha a'appe. Pegih,  
mt ab wo si has elidad chum  
hekid mamt he'es i tash ia d wo  
dodakamk.

<sup>18</sup>Heki o hu hab elidas mat wo  
em-do'ibia g heki hu em-himdag.  
Em-shohshonbad ash wa chum  
em-mashcham mamtsh ha'ichu ab  
wo namkid g Jiosh k hekaj am wo  
i e ap'ech nenaj ed. Kumtp hems  
chum namkid g plahda o g ohla o  
wabsh chum haschu. K wabshaba  
ihda hab mahs ha'ichu d wabsh pi  
ha'ichu am Jiosh tahgio. Kum am  
hahawa s-mahch mat g Jiosh ba'ich  
i s-namkig ha'ichukaj em-do'ibia.

<sup>19</sup>Am o t-tashogid g Jiosh mat has  
masma wo t-do'ibia am t-chehanich  
mattsh wo mua g si s-kehg kahwal  
k ab wui wo iagchul. Pegih, k g  
Jesus Christ d si hekia s-ap'ekam  
ch hab sha masma e muhkid am  
t-wehhejed mat wo t-do'ibia ab  
amjed g s-ko'ok t-namkidadag mach  
d pi ap chu'ijkam. <sup>20</sup>Jiosh at am i  
kei mat eda koi in hu nahto g jewed  
k hemuch hahawa in i maskogi  
jewed dahm mat wo t-do'ibia <sup>21</sup>k  
ab i wuhshad am i dahm mat e  
muhkid k ab uhgk i be k ab dai  
e-hugid an k ab si has elid. Kumt  
heg hekaj ab i s-wohoch g Jiosh k  
ab si hiwigi.

<sup>22</sup>Jiosh at ab i hekiagi g  
em-doakag namt pi ab s-wohog el g  
wohokam ab amjed. Pegih, ab g a'ai  
wo e tatchuad wehs e-ihbdagkaj.

<sup>23</sup>Pi at hekid wo huhug g Jiosh  
ha'ichu ahga. Kutt ab i s-wohochud  
k hekaj ab bei g wechij doakag. T  
id hab wa'ap pi hekid wo huhug,

chum as g t-chuhkug wo huhug.

<sup>24</sup>Neh, an o hab chu'ig Jiosh o'ohana ed:

Hemho wa at wehsijj wo koi g o'odham hab masma mat g washai wo gaksh.

T g ha-gewkdag wehs wo huhug hab masma mat g ha'ichu heosig.

<sup>25</sup>T wabshaba g Jiosh ha'ichu ahga pi hekid wo ha huhug.

*Isaiah 40:6-9*

Neh, bo chu'ig. K d hegai ha'ichu ahgaj mat am em-wui e u'apa.

#### Mach ab ab g Christ

**2** Gam g hu hab wo i juhni g s-padhog elidadag ch iattogida ch hehgamdadag ch has ahgadag.

<sup>2-3</sup>Jiosh ha'ichu ahga o d s-kehg gegosig g em-doakag wehhejed. Ab at em-wui chehgi g e-ho'ige'idadag. Kumt ab wo si tatchuad hab masma mo g s-moik ali tatchua g wihbi ch hekaj wo i ge'elhid am e-do'ibiadag ed.

<sup>4</sup>Ab g wehs wo i e dagito t-kownalig Jesus wui. Ha'i o chum s-ohhodamk g hemajkam. T wabshaba g Jiosh am i kei mat d wo t-shonk am t-wohochudadag ed. <sup>5</sup>Kumt ab wo abkad hab sha masma mat g hohodai ab wo abkad g e-shon am ha-kihta ed. Heg o wa wepo mach ab ab kihtas g Jesus ch d ge'e cheopi no pi am hahawa t-eda g Jiosh. Jiosh at wehs am i t-chuhcha ahchim Jesus wohochuddam matt d wo hekiakam papalk ch ab wui wo t-ho'ige'idahunad ch am hab wo junihid g tatchuij. T id heg wo wa wepok mo g s-ap iagchulida no pi g

Jiosh s-hohho'id. <sup>6</sup>Id ani hab kajj no pi an o'ohanas mo g Jiosh hab kajj:

Am ant wo hema i kei mat d wo ha-shondagk g ni-hemajkamga.

T hegam mat ab wo i s-wohoch pi hekid heg hekaj wo si e elidad. *Isaiah 28:16*

<sup>7</sup>Neh, bo kajj g Jiosh. K ihda kehshaj woho d si t-tatchui ahchim mach ab s-wohochud. T wabshaba hegam mo pi ab hu wohochud wabsh s-ohhod. Id o hab ahgch an o'ohanas mo g Jiosh hab kajj:

Ni-kehsha at d wo ha-shondagk g ni-hemajkamga, chum as g ha-wanimeddam wo chum s-ohhod. *Psalms 118:22*

<sup>8</sup>K an ep o'ohanas:

Hemajkam at ab ab wo keiko hegai mat d wo chum ha-shondagk. *Isaiah 8:14*

Id o hab d ahga mat mu'ijj pi ab hu wo wohoch g Jiosh ne'oki k pi wo mahchk g kehshaj. K d Jiosh tatchui mat idam pi wo e do'ibia.

<sup>9</sup>Kum eda ahpim ab s-wohochud ch d Jiosh hemajkamga ch wehs d papal am wehhejed g t-kownalig Jesus. Jiosh at am i em-chuhcha mamt wo i ahgahi g s-kehg ha'ichu tatchuij. Ab at i em-wuwhas s-chuhugam k amjed k ab i em-wahpki si s-kehg tonlig ch ed no p i ab em-mahkch g amichudadag.

<sup>10</sup>Heki am hu pi d ha'ichu ch wabshaba hemuch d hahawa Jiosh hemajkamga ch ab hahawa u'ukch g Jiosh ho'ige'idadag.

#### Matt hab wo junihid g Jiosh tatchui

<sup>11</sup>Pegih, ni-wepnag, pi am ia hu d si kihkam jewed dahm. Chum o

hems g hejel em-tatchui cheggia g em-do'ibiadag. Kunt wo si em-ahgi mamt pi ab hu wui wo i e dagito <sup>12</sup>k wabshaba hab wo junihid g s-ap'ekam. T hab wo nei g s-ap ha'ichu hab em-juni hegam matp hedai ab ha'ichu em-abchud. T ab wo i e ai g ge'e lodaita tash. T idam hemho wa wo wohokamch mat g Jiosh si s-kehg ha'ichu hab juh am em-doakag ed.

<sup>13-14</sup>Ab g wo s-wohog elidad g kownal ch wehs hegam mo d kownal chuhchai. Idam o chum s-ko'okam ha namkid g pi ap chu'ijkam ch ab i ha gewkemhun g s-ap chu'ijkam. <sup>15</sup>K d Jiosh tatchui mamt ab wo s-ha wohog elidad ch hab wo junihid g s-ap'ekam. T hab pi wo e nako mas has wo em-ah hegam matp hems nahnko em-ahg. <sup>16</sup>Ab at i em-wuwhas g Jiosh heki hu em-himdag amjed. Mt hab masma am hab wo e junihid mam d e do'ibiakam ch d si piongaj g Jiosh ch wabshaba pi wo hekaj g e-ap'edag mams am hu hab wo juh g pi ap'ekam. <sup>17</sup>Ab g wo ihmud g Jiosh ch ab wo si has ha elidad g kokownal ch s-ap ab wo ha neidad g hemajkam ch ab wo si pihk e elidad ha hekaj g e-wehm wohochuddam.

**Matt has masma ab wo bei  
g t-sho'igchudadag**

<sup>18</sup>Ahpmion pion, ab g wabsh wo i e dagitokchid e-a'amo ha wui ch ab wo has ha elidad, chum as ha'ijj wo s-ta kek'eidakam. <sup>19</sup>Kut g Jiosh ab wo s-em-ho'ige'idad. S-ap'e o mamt s-ap wo nako g sho'igchudadag s-chegitokch g Jiosh. <sup>20</sup>Ab o d

t-wuikam g s-ko'ok namkidadag mattp hab wo junihid g pi ap'ekam. Ttp wabshaba s-ap wo nako g sho'igdag am hab chum junihidch g s-ap'ekam, t g Jiosh ab wo wa s-t-ho'ige'e'l id hekaj <sup>21</sup>no pi hab d elidaj matt s-ap ab wo nako.

Id o wa am t-chehgidch g Christ mo wa eda s-ap ab nakog g sho'igdag am t-wehhejed.

<sup>22</sup>Neh, pi at hekid hab juh g pi ap'ekam k pi hekid sha'i ha'ichu ha iattogid. *Isaiah 53:9*

<sup>23</sup>Ab amt wa si s-ko'okam has ah. T wabshaba pi ab hu aigo has ha ah. Si amt sho'igch. T wabshaba pi ha ebkiok k ab wabsh i e dagitokch Jiosh wui s-mahchch mo heg d si s-ap'ekam usagakam. <sup>24</sup>Christ at wehs moht g t-chu'ijig k heg hekaj ab e muhkid kots t ab mat wo t-do'ibia. Kutt hab wo dagito g pi ap'ekam k am wo i hihi s-ap'ekam oidk. Sho'igchudadaj at doaj g t-doakag.

<sup>25</sup>Dach wa heb hu hihimkam hab sha masma mat g kahwal wo heb hu hih. *Isaiah 53:6*

T g Christ ab uhpam i t-ui e wui k s-ap nuhkud g t-doakag hab sha masma mat g kahwal ha nuhkuddam hab wo juh g heb hu himkam kahwal.

**Mat has wo chum masmak g u'uwi**

**3** Ahpmion u'uwi amt ab wo e dagitokch hehe'ejel e-kuhkun ha wui k ch s-ap wo ha nuhkudad chum hems hegam mo pi ab hu wohochud g Jiosh. Tp hems ab wo i s-wohoch <sup>2</sup>am neidch g s-ap ha'ichu hab em-juni, chum ams hems pi has wo kajjid ab amjed g

e-wohochudadag. <sup>3</sup>S-ap amt ulinim d wo u'uwik ch wabshaba heg pi ab hu wo hiwgad mams ab wo si has masma e ap'ech. Pi at wo em-ap'ech am Jiosh tahgio mamt has masma wo ap'ech g e-mo'o o an hab wo juh g si s-namkig a'anilo ch sisishpakud ch eniga. <sup>4</sup>Ba'ich i mamt wo s-hemajimak ch wo s-dodolimak. T hab wo s-ap'ek g em-doakag am Jiosh tahgio. <sup>5</sup>Bo wa masma hab chu'ig g Jiosh wohochuddam u'uwi ga hu i wehpeg ch ab i e dagitokch hehe'ejel e-kuhkun ha wui. <sup>6</sup>Sarabad o wa hab chu'ig ch ab s-wohog elid g Abrahamad mo heg d ha-wanimeddam am ha-kihdag ed. Kumt ahpim Jiosh wohochuddam u'uwi am hab wo junihid g s-ap'ekam ch pi ha'ichukaj wo e kudutad. T heg wo wa wepok mam d Sarabad amjedkam.

**Mat has wo chum masmak g chechoj**

<sup>7</sup>Ahpim chechoj amt ab wo has ha elidad g e-hohonig nam pi s-mahch mo pi am hu hugkam s-gewkdag mam ahpim. Bamt masma s-ap wo e ho'ige'idahunad g e-hohonig ha wehm. T g Jiosh ab wo em-kaihamad. Am g wo s-chegitok mam e wehm u'ukch g pi ha huhgedam doakag no pi g Jiosh ab em-mahkch.

**Matt s-ap wo nako g sho'igdag**

<sup>8</sup>Wehsijj amt ab wo i e hemakochud k ab a'ai wo si i e tatchuad ch wo s-e ho'ige'idad ch ab wo i e sho'igch a'ai e wui. <sup>9</sup>Pi g am wo e agwua g pi ap'ekamkaj k pi ab hu wo i nodagi g pi kehng ne'oki. Ab o t-ab matt ab wabsh wo

i s-ha ho'ige'el. T g Jiosh ab epai wo i s-t-ho'ige'el nat pi heg hekaj ab i t-wai. <sup>10</sup>An o hab chu'ig Jiosh heki hu o'ohana ed:

Pi g am wo pad neneokad ch pi ha'ichu wo ha iattogidad mamtp wo tatchuad mamt s-ap e tahtk ch in d wo dodakamk ch wo s-hehgigk.

<sup>11</sup>Hemho wa amt wo s-ohhod g pi ap'ekam k am hab wo junihid g s-ap'ekam ch am wo i e nako mamt wo s-ap e tahtkkad ab wehs ha wui.

<sup>12</sup>T g Jiosh wo em-nuhkudad ch ab wo kaihamad g em-ho'ige'idahunad.

Mtp wabshaba hab wo junihid g pi ap'ekam, t g Jiosh ab em-wui wo kekkad.

*Psalm 34:12-16*

Neh, bo wa masma an o'ohadag.

<sup>13</sup>K pi hab chum mahs mas hedai wo s-ko'okam em-juh mamt am wo si e nakogad mamt am hab wo junihid g s-ap'ekam. <sup>14</sup>Tp hab wo mahsk mamt wo e sho'igch am hab junihidch g s-ap'ekam, mt wabsh wo s-ap e tahtkkad nat pi g Jiosh ab wo wa s-em-ho'ige'el heg hekaj. Pi g wo sha'i ha ehbidad hegag mat wo em-sho'igchudad.

<sup>15</sup>Ab g wo has elidad g t-kownalig Jesus Christ ch chum hekid wo e nahtokchid mamt s-ap wo ahgi mat hedai ab wo i em-kakke mam haschu wui ab e gewpkadch. <sup>16</sup>Kumt wabsh si s-ap e taht k wabsh s-hemajim ab wo ha ahgi.

Ha'i atp hems pi ap has wo em-ahg k ab wo chum em-abch g pi ap'ekam k wabshaba wo si e el mamtp chum hekid am hab wo

junihid g s-ap'ekam. <sup>17</sup>S-ap'e o matt wo t-sho'igch am hab junihidch g s-ap'ekam matp d wo Jiosh tatchuik. K wabshaba d si edadag mattp am hab wo junihid g pi ap'ekam ch hekaj wo t-sho'igch. <sup>18</sup>Jesus Christ o d hekia s-ap'ekam ch wa eda e sho'igch. Pegih, tt ahchim hab wa'ap wo t-sho'igch.

E at muhkid g Jesus Christ am t-wehhejed ahchim mach d pi ap chu'ijkam mat am wo i t-ui Jiosh wui. Chuhkugaj amt hi wa chum mua. T wabshaba g Hekia S-ap'ekam Gewkdag ba'ich i mah g gewkdag. <sup>19</sup>Id gahi wuhshanim Hekia S-ap'ekam Gewkdag o wa g Jesus Christ am ha mihshmad hegam mo hemu d ko'i ch gam hu si kuhpi. <sup>20</sup>Jiosh ash wa si s-hemajim ab ha nenida g hemajkam mash eda g Noahbad ab s-wohog elid ch nahtohim g ge'e wahlko. Tsh wabshaba g hemajkam pi ab hu wohog el. Tsh hab ha wi'in. Tsh hegam wa'i Noahbad e do'ibia am i wahpk wahlko ch ed matsh am i ha wi'in. Sh d gigi'ik hemajkam matsh e do'ibia. <sup>21</sup>Id ani wepogid g t-pahl wakonadag. Heg att hekaj am t-chehgi mach s-wohochud mat g Jesus Christ s-ap gahi wuhsh g muhkig am t-wehhejed. Tt ahchim hab wa'ap s-ap wo gahi wuwaha. Pi o hab d ahga g pahl wakonadag machs wabsh wako g t-chuhkug. Bo d ahga matt ab i t-dagito Jiosh wui nat pi gam hu hab i juh g pi ap t-chu'ijig. Ch hahawa pi heg hekaj t-kudut. <sup>22</sup>Christ at gam hu hih dahm kahchim wui. Kush g Jiosh ab si has elid an e-hugid an dahshch e-kownal daikud an. Kush

g anghil ch nahnko mahs gewpkdag an dahm kahchim ch ed ab wecho.

**Mat g Jesus am gawul juh g t-doakag**

**4** E at sho'igch g Christ k hekaj am gewito g pi ap'ekam t-wehhejed. Kumt id wo s-chegitok namt pi hab wa'ap wo e sho'igch mamt wo gewito g pi ap'ekam. <sup>2</sup>Hemho wa amt am wo e-dagitokchid Jiosh wui wehs e-doakdag oidam ch pi g hejel e-tatchui hab wo junihid. <sup>3</sup>Tash amt am hihi pi ap'ekam ch ed mam ab jioshga ihda jewed t ab ha'ichu ch nawkko'o ch wabsh e totontochud ch ha wehm wo'iwup hegam mo pi d em-wehm kihkam. <sup>4</sup>Hemu at e ai mamt ha'asa hab juh hegai hab mahs pi ap'ekam. K g em-wehm o'odham hahawa pi em-amichud ch ab si has em-ahg. <sup>5</sup>E o nahtokch g Jiosh mat wehs wo ha lodai g hemajkam, chum hems hegam mat heki hu koi. Kut wehs wo ah g pi ap e-chu'ijig hegam mat pi dagito. <sup>6</sup>E ash wa ahgahim g s-kehg ha'ichu ahga chum hems wa hegam ha wui mat idani heki hu koi matp hems ab wo bei g pi ha huhugedam doakag k an haha wo wehmajk g Jiosh.

**Matt wo s-ap hekaj hegai mo g Jiosh ab t-mahkch**

<sup>7</sup>E o aihim mat wo huhug g jewed. Kumt wo si e nuhkud ch wo si s-e tahtkkad ch hab s-ap wo e ho'ige'idahunad. <sup>8</sup>Id o d i si ha'ichu mamt ab wo si ha tatchua g e-wehm wohochuddam k hekaj wabsh wo pi chegito g pi ap ha-chu'ijig. <sup>9</sup>S-hohho'idam amt ab a'ai wo i e hiwigidat e-kihki ed.

<sup>10</sup>Ab o t-mahkch g Jiosh g nahnko mahs mahchig ch ap'edag. K hab d elidaj matt am a'ai wo i t-wehmtad id hekaj t-ap'edag. <sup>11</sup>Mamtp hedai wo ha mihshmad k heg wa'i Jiosh ha'ichu ahga wo ahgad. Mtp hedai ab wo mahksk mamt wo i ha wehmtad g hemajkam, mt am hab wo juh heg hekaj gewkdag mo g Jiosh ab em-mahkch. Bamt masma ab wo si has elidad g Jiosh am gahi wuhshanim g Jesus Christ. Neh, wehs o ab d t-wuikam matt ab wo wechokad ch ab wo hehgchulidad chum hekid.

**Matt has masma ab wo  
nakogad g sho'igdag**

<sup>12</sup>Ni-tatchuidch ni-wepnag, pi g am wo has elidad mam ab nakog g sho'igdag. <sup>13</sup>Jesus Christ o wa heg ab nakog. Kumt wo si s-hehgigk mam hab wa'ap nakog am hab junihidch g chikpanaj. Ab o him g tash mat g gewkdaj wo i e maskogi. Kumt hahawa ba'ich wo i s-hehgigk. <sup>14</sup>Mtp hems s-ko'okam has wo em-ahgad nam pi ab si ihm g Christ. Kumt wabshaba wo si s-ap e tahtkkad no pi am em-wehmaj g Hekia S-ap'ekam Gewkdag. <sup>15</sup>Pi g am hu hab wo junihid g pi ap'ekam. T wo em-ai g s-ko'ok em-namkidadag. Pi g wo ha mua'i. Pi g wo s-chu e'eskad. Pi g wo hudawogad hegai mo haschu pi ab hu em-him. <sup>16</sup>Mt ab wo si i ho'ige'el g Jiosh k pi has wo e el mamtp wo sha e sho'igch heg hekaj mam ab si ihm g Christ.

<sup>17</sup>E at ai mat g Jiosh wo t-a'appe. Kutt chum hems ahchim Jiosh hemajkamga wo t-a'appe g

sho'igchudakaj. Pegih, t hemho wa ba'ich ab wo i nei g sho'igdag hegam mo pi ab hu wohochud g Jiosh ha'ichu ahga. <sup>18</sup>Neh, bo chu'ig g heki hu o'ohanaj g Jiosh:

S-hasigam at wo e do'ibia hegam mo hab elidas mo d s-ap'ekam.

T eda g Jiosh ba'ich i s-gewkam wo ha a'appe hegam mo pi ab hu wohochud. *Proverbs 11:31*

<sup>19</sup>Neh, Jiosh o d t-nahtokam ch woho hab wo juh hegai mo hab kaij mat hab wo juh. Kumt heg hekaj ab wui wo i e dagito, chum as hems wo hiwigi mamt wo e sho'igch am hab junihidch g s-ap'ekam.

**Mamt has wo masmak mam  
d Jiosh hemajkamga**

**5** Ahni ani wa g ni-wuhpuikaj neid mad wa mu'i e sho'igch g Jesus Christ. Jiosh o ab si has elid ch wehmaj ab si has t-elid ch id am wo maskogi mat hekid ia ep wo jiwia g Christ jewed dahm. K ab ni-ab mant wo ahgahid ab amjed. Dani hema ha wanimeddam g Jiosh hemajkamga ch heg hekaj am i em-gewkemhun ahpim mam hab wa'ap d ha wanimeddam. <sup>2-3</sup>Am o ha'i em-nuhkudachud g Jiosh g hemajkam. Kumt wo si s-ap ha nuhkudad hab masma mat g kahwal ha nuhkuddam hab wo ha juh g e-kahwaliga. S-mahch am mo pi ha shahdahim ch wabshaba s-ap ha wanimed. Kumt ahpim hab wa'ap wo ha wanimedad g hemajkam ch am wo ha chehgi g e-doakagkaj mat has wo chum masmak. Pi o hab chum chu'ig mams ab wo ha'ichu

si i ha chehanid. K pi hab chum chu'ig mams wo si tatchuad g e-namkidadag heg hekaj chikpan. Mt wo chum si tatchuad mamt si s-ap wo ha nuhkudad. <sup>4</sup>T g Jesus Christ ab wo em-mah g pi ha huhugedam si has elidadag mat hekid ia ep wo jiwia jewed dahm no pi heg wehsijj d t-nuhkuddam.

<sup>5</sup>Ab amt wo ha kaihamad g e-wanimeddiam. Wehsijj amt wabsh wo i e sho'igchudad. Neh, bo chu'ig g Jiosh o'ohana:

Jiosh at ab ha wui wo kekiwua hegam mo chum si e haschud k wabshaba wo ha mah g ho'ige'idalg hegam mat ab wo i e sho'igch. *Proverbs 3:34*

<sup>6</sup>Pegih, mt ab wabsh wo i e sho'igch Jiosh wui. Kut heg ab haha wo si em-ha'ichuch mat hekid am wo s-ap'et. <sup>7</sup>Ab g wehs wo i dagito g e-kudutadag Jiosh wui no pi ab si em-tatchua.

<sup>8</sup>Si g wo s-e tahtkkad ch wehs ha'ichu wo si nenashanad. Jiawul o chum s-t-u'imk ch s-ko'okam s-t-junimk hab masma matp g mawid wo sha t-be k hab wa'ap wo s-ko'okam t-juh. <sup>9</sup>Wehsijj g em-wehm wohochuddam o ab nakog ihda hab mahs sho'igdag. Kumt heg hekaj s-wihnam wo

gegokkad e-wohochudadag ed ch ab wui wo gegokkad g Jiawul.

<sup>10</sup>Jiosh at ab i em-gawulkai mamt ab wo i s-wohoch g Jesus Christ k chum hekid wehmaj wo edgidag g si s-kehg ap'edag. Kumt al ha'as wo i taht g sho'igdag. T g Jiosh ab wo em-mah g gewkdag k hab wo em-juh mamt wo ge'ege'ehogat k s-wihnam wo gegokkad. <sup>11</sup>Jiosh o d gewkdag chum hekid. Kutt chum hekid ab wo hehghulidad.

**Mat ia i kuhgi g e-o'ohana g Peter**

<sup>12</sup>Ia o ni-wehmaj g Silas ch am o'oha ihda al ha'ichu ni-ahga k am wo i bei em-wui. Ab ani si hiwig g Silas am eda ihda chikpan.

Jiosh o si s-hemajim ab i em-wehmt. Kuni am i em-gewkemhun mamt pi hekid wo pi chegito g i wehmtadaj.

<sup>13</sup>Idam t-wehm wohochuddam mo ia d kihkam Rome t am o s-em-ahgidamk mamt ab wo i s-ha ho'ige'el.

Ia o ep ni-wehmaj g t-wehnag Mark ch hab wa'ap s-em-ahgidamk mamt ab wo s-ho'ige'el.

<sup>14</sup>Ab g wo a'ai si e ihmud, ahpim e wehm wohochuddam.

Ab at wo wa ba'ich i em-mah g Jiosh g s-ap tahhadkam.